

國

朝

列

卿

紀

國朝列卿紀卷之一百一

總督漕運兼巡撫鳳陽等府

夫憲臣總漕者非古制也自大禹以司空平水土

貢道蓋後世漕運之端周官有開渠築堰導河益旣各職而漕
法未講至漢元光三年天子使鄭當時爲大司農嘗奏漕渠地
節中郭昌則以光祿大夫使行河北河平元年河隄使王延世
則又以勞賜爵關內侯晉隋之間漕法或領於尚書或領於倉
部侍郎雖官無定銜皆簡自廷臣其責任亦重且大矣唐百官
工部尚書以下則有水部郎中員外郎各一人掌津澤渠梁運
漕碾磴之事外則又有河隄謁者六人諸津令各一人追闢元

初李傑爲水陸運使而使之名始見十一年裴耀卿以黃門侍郎同中書門下平章事充江淮都轉運使而以崔希逸蕭炅爲副使而副使之名亦始此天寶則以韋堅充勾當轉運使第五琦充諸色轉運使劉晏則以戶部侍郎充諸道轉運使厥後韓滉杜棕崔紹緯皆以宰相充而諸道巡院皆統焉自裴耀卿言漕事進用者常兼轉運之職惟韋堅爲最若劉晏則以轉運爲已任嘗與元載書曰見一水不通思荷鍤而先往見一粒不運思負米而先趣故時最著名迨乾德以後始置諸道轉運使其使之名但曰勾當某路水陸計度轉運事官高者則曰某路計度轉運使雍熙四年并水陸路發運爲一司以右神武將軍王

繼昇掌之太平興國初皆曰使兩省以上則爲都漕運使又置副使與諸路判官又置同勾當轉運事俄罷諸路副使真宗每用兵或令都部署兼轉運使王師征討則有隨軍轉運使事畢卽停熙寧初詔河東河北陝西三路漕臣許乘傳赴闕留無浹日又詔漕臣令自辟屬各二人以京朝官曾歷知縣者爲之宣和初又詔陝西以都漕兩員治於長安而漕臣三員分領六路時知名者若魯宗道若蔣之奇若張綸若許元芳張方平嘗畫漕運十四策宰相富弼讀其奏上前上太息稱善崇寧初蔡京爲相始求羨財以供侈費充使者遂有進獻而職墮矣元世祖中統二年始立軍儲所尋改漕運所至元改漕運司又改都漕

運司十九年改京畿都漕運使二十四年內外分立兩運司其員則有運使有同知有副使有判官而押官隸焉其初漕法猶有可觀歷歲既久弊日以滋歲三省之民力以充歲運之恒數而押運監臨之官與夫出納之吏恣爲貪黷至元之後有不可勝言者矣迨我太祖奄有天下貢賦之外海運以營遼東五年嘗命靖海侯吳禎率舟師往運後又遣都督朱壽張赫領之二十年冬十月戊申朔享太廟封壽爲舳艫侯赫爲航海侯又嘗建漕運使尋罷成祖續承大業建立漕運而革使職乃命武職重臣總理景泰二年因漕運不繼特命都御史王竑總督與總兵叅將同理其事隨該吏科給事中李瓚題准淮揚廬

鳳四府徐和滁三州就令王竑兼管巡撫監督常關倉遂爲定制而治必於淮者蓋淮左江右河東控海道北接兗豫西接兩都諸陵厥在况淮古稱難治故曰淮夷國初駙馬都尉黃寶嘗鎮守於斯至今不改轍焉故京操十二營軍有十二萬漕有二總軍亦有十二萬中外相援兵食相資豈無謂哉惟總漕兼巡撫肇自景泰二年至成化八年改巡撫總漕各設一員九年復舊正德十三年又改各設一員十六年復舊嘉靖三十六年又改各設一員四十年復舊其巡撫自永樂十九年命吏部尚書蹇義巡行南畿考察官吏至宣德五年始命刑部右侍郎曹弘巡撫正統八年又命工部右侍郎王永和巡撫十三年又命

刑部右侍郎薛希璉吏部尚書趙新相繼巡撫然未奉漕命故
另列表首今詳漕臣臣履歷後其行實見於事紀其勲德茂著
者表爲列傳若奉勅清理田地賑濟饑民并考察官吏有事
淮南不可以類附者亦另別於後

國朝列卿紀卷之一百一

勅使淮南尚書侍郎都御史年表

虞謙

直隸金壇人永樂七年以都察院右副都御史巡視淮揚徐州旱災

鄭綱

河南南陽人永樂九年以工部侍郎巡視江淮山東救荒撫民

蹇義

四川巴縣人永樂十九年以吏部尚書巡視

朱侃

浙江海鹽人永樂十九年以左通政督漕運

周忱

江西吉水人宣德五年前以工部右侍郎總理糧儲正統初命巡視虧課

何文淵

江西廣昌人正統元年以刑部右侍郎清理淮揚鹽法

賈諒

山東嶧縣人正統二年以都察院右副都御史救荒并捕治反獄強賊

薛希璉

浙江麗水人正統八年前巡撫以刑部右侍郎清查軍民田土

耿九疇

河南盧氏人正統十四年以刑部右侍郎賑濟江北清理鹽法

江淵

四川江津人景泰三年以內閣巡視淮徐

王暹

浙江山陰人景泰三年以河南巡撫右都御史考察鳳陽賑恤徐州

鄒幹

浙江餘杭人景泰四年以禮部右侍郎賑濟鳳陽

王儉

四川銅梁人天順元年以都察院右僉都御史賑恤淮揚

林聰

福建寧德人天順三年以右副都御史捕江准郡盜成化二年以右副都御史賑恤江北

吳琛

直隸繁昌人成化元年以右僉都御史賑恤淮揚

馬顯

直隸廣平人成化六年以南京兵部右侍郎巡視鳳陽等郡

喬毅

山西樂安人成化七年以工部右侍郎督漕淮揚

王璟

山東沂州人弘治十四年以右僉都御史理兩淮鹽法

何

鑑

浙江新昌人弘治十四年以刑部左侍郎賑濟山東兗州直隸徐邳等州大旱

王

華

浙江餘姚人弘治十六年以南京吏部右侍郎賑恤淮揚

王

瓊

山西太原人正德元年以副都御史總督鹽法

叢

蘭

山東文登人正德七年以戶部右侍郎兼僉都御史賑濟

席

書

四川遂寧人嘉靖二年以南京兵部右侍郎賑濟江北饑民

劉

玉

江西萬安人嘉靖三年以刑部右侍郎賑濟淮揚

黃

臣

山東濟陽人正德辛未進士嘉靖六年以右副都御史總理兩淮鹽九年回籍

王

璣

浙江西安人嘉靖己丑進士三十年以右僉都御史提督徐兗農田三十二年回籍

王

紳

直隸滄州人嘉靖己丑進士三十年以右僉都御史總理兩淮及浙江等處鹽法三十二年回籍

吳

鵬

浙江秀水人嘉靖三十二年以刑部侍郎賑濟徐邳饑民

朱

衡

江西萬安人嘉靖四十四年以工部尚書兼右副都御史總理河道漕運

江北巡撫侍郎都御史年表

曹

弘

湖廣益陽人永樂乙未進士宣德五年以刑部右侍郎巡撫正統二年卒於官

王永和

南直隸崑山人正統八年以工部右侍郎巡撫十年回部

薛希璉

浙江麗水人正統十年以刑部右侍郎巡撫保定淮安十二郡

趙

新

浙江富陽人永樂乙酉舉人正統十三年以吏部右侍郎巡撫十四年陞吏部尚書照舊任景泰二年養病卒

景泰二年以後俱總漕兼管巡撫正德十三年至十六年漕運

巡撫各設官尋復舊嘉靖三十六年又分設四十年復舊

李

遂

江西豐城人嘉靖丙戌進士三十六年以右僉都御史巡撫鳳陽等處提督軍務

唐順之

南直隸武進人嘉靖己丑會元進士三十八年以右僉都御史巡撫三十九年卒於官

劉景韶

湖廣崇陽人嘉靖甲辰進士三十九年以右僉都御史任四十年閑住

嘉靖四十年歸總漕兼理

總督漕運兼撫鳳陽尚書侍郎都御史年表

王

竑

陝西河州衛人進士景泰二年以左僉都御史任加左副都兼巡撫江北天順元年除名五年復任

陳

泰

福建光澤人永樂癸卯解元天順八年以右副都御史任成化元年致仕

滕

昭

河南汝州人舉人成化二年以右副都御史任陞兵部左侍郎

陳

濂

浙江鄞縣人進士成化五年以右副都御史任七年丁憂後起撫保定

張

鵬

直隸涑水人進士成化七年以左僉都御史任

李

裕

江西豐城人進士成化十年以右副都御史任

李

綱

山東長清人進士成化十四年以左僉都御史任十五年卒於官

張

璜

湖廣孝感人進士成化十五年以左副都御史任十九年卒於官

徐

英

四川中江人進士成化十九年以右副都御史任二十年致仕

劉

璋

福建南平人進士成化二十年以右副都御史任

馬文升

河南鈞州人進士成化二十一年以右都御史任

李

敏

河南襄城人進士成化二十二年以右副都御史任

丘

鼎

江西貴溪人進士成化二十三年以右副都御史任弘治元年致仕

秦

紘

山東單縣人進士弘治元年以左副都御史任

李

昂

浙江仁和人進士弘治二年以右副都御史任三年致仕

張

瑋

直隸景州人進士弘治三年以右副都御史任七年致仕

李

蕙

直隸當塗人進士弘治七年以左副都御史任十二年加右都本年乞歸展墓卒於家

徐鏞 湖廣興國人進士弘治十三年以右副都御史任本年卒於官

張敷華 江西安福人進士弘治十二年以右都御史任歷都察院左都御史

張縉 山西陽曲人進士弘治十四年以右副都御史任

洪鍾 浙江錢塘人進士正德元年以右都御史任歷都察院左都御史太子太保

王瓊 山西太原人進士正德二年以右副都御史任

李瀚 山西沁水人進士正德二年以右副都御史任

邵寶 直隸無錫人進士正德四年以左副都御史任本年忤逆璫致仕

屈直 陝西華陰人成化甲辰進士正德四年推左副都御史未任致仕

陶琰 山西絳州人進士正德五年以左副都御史任

張縉 見前正德六年以右都御史再任九年乞休

陶

琰

見前正德九年以右都御史再任十年致仕

叢

蘭

山東文登人進士正德十年以右都御史任十三年專理巡撫

藏

鳳

山東曲阜人進士正德十三年以右副都御史專督漕運十六年改學理巡撫歷南刑部尚書

許庭光

河南河陰人進士正德十六年以右副都御史專督漕運未至改巡撫四川

陶

琰

見前正德十六年以右都御史三任

俞

諫

浙江桐廬人進士嘉靖元年以都察院右都御史任

胡

錠

直隸長垣人進士嘉靖二年以右副都御史任陞南京戶部右侍郎

李

鉞

河南祥符人進士嘉靖三年以右都御史任歷兵部尚書

高友璣

浙江樂清人進士嘉靖四年以右都御史任

鄭

毅

江西上饒人弘治己未進士嘉靖六年以右副都御史改調未任致仕

唐

龍

浙江蘭谿人進士嘉靖七年以左僉都御史行歷吏部尚書加太子太保

毛思義

山東陽信人進士嘉靖八年以巡撫應天右副都御史改任改總理糧儲

陳祥

江西高安人弘治壬戌進士嘉靖九年以右副都御史總理糧儲改調未任被劾聽調

劉節

江西大庾人進士嘉靖九年以右副都御史任陞刑部右侍郎

馬卿

河南林縣人弘治乙丑進士嘉靖十一年以右副都御史任十五年卒於官

周金

直隸武進人進士嘉靖十五年以右都御史任十七年加左都歷南京戶部尚書

王杲

山東汶上人進士嘉靖二十年以右都御史任二十一年陞戶部尚書

張景華

山東剡城人正德甲戌進士嘉靖二十一年以左副都御史任二十三年被劾閑住

周用

直隸吳江人進士嘉靖二十三年以工部尚書兼右都御史任歷吏部尚書加太子太保

王暉

應天句容人進士嘉靖二十三年以右都御史任陞戶部尚書

喻茂堅 四川榮昌人進士嘉靖二十五

歐陽進 江西安福人進士嘉靖二十六年以右副都御史推未任歷吏部尚書加至少保

韓士英 四川南充人進士嘉靖二十六年以右都御史任歷南戶兵部尚書

胡松 直隸績溪人進士嘉靖二十七年以右副都御史任歷工部尚書

龔輝 浙江餘姚人嘉靖癸未進士二十七年以右副都御史任歷工部右侍郎

魏有本 浙江餘姚人正德辛巳進士嘉靖二十九年由南京刑部侍郎推右都御史未任以前任乞致仕

何鰲 浙江山陰人正德丁丑進士嘉靖二十九年以右副都御史任歷刑部尚書

應櫟 浙江遂昌人嘉靖丙戌進士三十年以兵部侍郎兼倉部御史任改督兩廣

駱頤 四川富順人嘉靖癸未進士三十年以戶部侍郎兼驗都御史任三十一年回籍

連鑑 直隸永年人嘉靖丙戌進士三十一年以右副都御史任三十二年開仕

吳

鵬

浙江秀水人嘉靖癸未進士三十二年以兵部侍郎兼僉都御史任歷吏部尚書加太子太保

鄭

曉

浙江海鹽人嘉靖癸未進士三十二年以兵部侍郎兼僉都御史任歷刑部尚書

陳

儒

錦衣衛籍交趾人嘉靖癸未進士三十四年以右都御史任三十五年聽調

蔡克廉

福建晉江人嘉靖己丑進士三十五年以右副都御史任歷南京戶部尚書

王

誥

河南西平人嘉靖癸未進士三十六年

傅

頤

湖廣沔陽人嘉靖壬辰進士三十八年以右副都御史任三十八年專督漕任陞戶部侍郎

章

煥

直隸吳縣人嘉靖戊戌進士三十八年以右副都御史任督漕三十九年調督南諸道戊

何

遷

湖廣德安籍嘉靖辛丑進士三十九年以右副都御史督漕四十年陞南京刑部侍郎

胡

植

江西南昌人嘉靖乙未進士四十年以右副都御史督漕本年降南京光祿寺卿

喻

時

河南光州人嘉靖戊戌進士四十年以右副都御史督漕兼理巡撫四十一年改總督三邊

毛

愷

浙江山陰人嘉靖乙未進士四十二年以右副都御史任本年改北院

王

廷

四川南充人嘉靖壬辰進士四十年以戶部右侍郎兼僉都任

馬

森

福建懷安人嘉靖乙未進士四十四年以都察院右都御史任陞南戶部尚書

張

瀚

浙江仁和人嘉靖乙未進士四十五年以兵部右侍郎兼僉都御史任改總督兩廣

方

廉

浙江新城人嘉靖辛丑進士隆慶元年以右副都御史任

趙

孔昭

直隸刑臺人嘉靖甲辰進士隆慶三年以右僉都御史任

陳

炯

江西臨川人嘉靖辛丑進士隆慶四年以右副都御史任

王

宗沐

浙江臨海人嘉靖甲辰進士隆慶五年以右副都御史任

張

狷

廣西馬平人嘉靖癸丑進士萬曆三年以兵部右侍郎兼僉都御史總督漕運兼提督軍務巡撫歷

郎

吳桂芳

江西新建人嘉靖甲辰進士萬曆四年以兵部左侍郎總督漕運兼提督軍務巡撫

江一麟

直隸婺源人嘉靖癸丑進士萬曆六年以戶部右侍郎兼右僉都御史總督漕運兼提督軍務巡撫

凌雲翼

直隸太倉州人嘉靖丁未進士萬曆八年以兵部尚書總督漕河軍務巡撫回部協理京營戎政

傅希摯

直隸衡水人嘉靖丙辰進士萬曆十一年由開任起戶部右侍郎兼右僉都任本年回部

李世達

陝西涇陽人嘉靖丙辰進士萬曆十一年以右副都御史總督漕運兼撫鳳陽十二年陞南兵右侍郎

王廷瞻

湖廣黃岡人嘉靖己未進士萬曆十二年以右都御史兼戶部右侍郎總督兼巡撫鳳陽十三年陞戶部尚書兼右副都御史仍任本年

改南京刑部尚書

楊俊民

山西蒲州人嘉靖壬戌進士萬曆十三年起戶部右侍郎兼僉都總督漕運兼巡撫鳳陽河道十四年回部

楊一魁

山西安邑人嘉靖乙丑進士萬曆十四年以戶部右侍郎兼右僉都總督漕運兼巡撫鳳陽十五年調用

舒應龍

廣西全州籍嘉靖壬戌進士萬曆十五年以戶部右侍郎兼右僉都總督漕運十八年陞南京工部侍郎

陳于陞

直隸曲周人嘉靖己未進士萬曆十八年由左副都陞工部左侍郎兼左僉都督漕

周 來

江西安福人嘉靖壬戌進士萬曆十八年由大理寺卿陞兵部右侍郎兼右僉都總督漕運二十年改吏部卒

勅使淮南行實

虞謙字

直隸金壇人永樂七年以都察院右副都御史巡

視淮安楊徐旱災疏民疾苦發廩賑貸官爲贖還所賣男女詳

大理寺卿

鄭綱字

河南南陽人洪武中釋褐國子監擢廣西左叅議

改兗州知府留心民瘼永樂五年陞山東左叅政七年陞工部

右侍郎九年命巡視山東江淮地方救荒撫民踰年卒詳國初

土部

蹇義字

四川重慶府巴縣人永樂十九年以吏部尚書奉

勅巡行南直隸安撫軍民考察官吏本年事竣還部詳吏部

朱侃字

三

浙江海鹽縣人永樂十九年以左通政督漕運以

稱職稱詳通政司

周忱字

三

江西吉安府吉水縣人宣德五年以越府長史陞

工部右侍郎巡撫江南總督糧儲然與淮揚接壤事多相關始至奏罷淮安徐州臨清三倉支米轉運之法以祛領漕軍民艱困於江都縣瓜州鎮江岸東浚三港建便民倉於港側令江南有司預修并守之限每年秋末蘇松常三府各運米貯於倉及冬初漕運江北三把總官軍駕船序泊瓜州以待南京戶部差官監兌其在淮安者亦如之定派兌正糧一石五斗五升淮兌則一石五斗運之衛所各出通關回繳漕規稱便利焉又築石

隄於瓜州南岸俾運行者不陷淖澤造巨艦操渡以免顛溺正
統初淮揚被災鹽課虧欠勅忱巡視忱奏令蘇松常三府將
餘米量撥一二萬石運赴各場收貯其米准作運民下年預納
糧額聽竈戶以餘鹽於附近場分上納照時估領米於時米貴
鹽賤民皆得食官亦得鹽上下賴之後江北大饑巡撫王竑與
忱會議借江南餘米助賑始及三萬石忱笑曰計至來年麥熟
須十萬石卽如數與之後始會疏奏聞忱前瓜州建置營築
皆取辦餘米而不煩有司其通才大計爲不可及如此詳總督
糧儲

何文淵字巨川江西廣昌人正統元年以刑部侍郎往淮揚理

鹽法惟私販情重者罪之餘從寬宥議者欲籍其家文淵力爭
一之全活者百餘家

賈諒字子信山東兗州府嶧縣人正統二年以都察院右副都
御史巡視淮濟賑活饑民十餘萬督築固安隄河道疏通人不
知勞二年徐州強賊反獄潛處芒碭間肆爲民患復奉命捕
治還至荏平遘疾卒詳都察院

薛希璉見巡撫正統八年以刑部右侍郎奉命清理鳳陽等
府軍民田地發奸摘伏無敢欺隱創造文冊式至今遵爲定規
本年事竣還部

耿九疇字禹範河南盧氏縣人永樂甲申進士擢禮科給事中

累官刑部右侍郎正統十四年鳳陽歲凶盜起勅九疇往綏之
九疇乃留英武飛熊諸衛軍耕守以杜奸寇覲覲之心招徠流
民七萬餘戶一方晏然會有言兩淮鹽政廢弛復命兼理之於
是奏罷易米法申飭條戒有加於舊尋復勅撫恤江北諸郡盡
心宣力有遺愛焉又勅審錄諸郡大辟囚九疇曰洗冤澤物吾
所願也凡以情得原者二十六人有婦人來何菊家者既去而
死其家訟菊與弟殺之菊誣服九疇驗其無實釋之後知殺者
果仇人也服其明代還改撫陝西歷南京刑部尚書詳南京刑
部

江淵字世用四川江津人景泰二年以內閣巡視淮徐詳工部

尚書

王暹字景陽浙江紹興府山陰縣人景泰三年以河南巡撫右都御史考察鳳陽官吏去留惟允又奉勅賑恤徐州饑民詳河南巡撫

鄒幹字新江餘杭人景泰四年以禮部右侍郎賑濟鳳陽河南等處大水幹奏免本年稅糧民多受惠詳禮部

王儉字四川重慶府銅梁縣人天順元年以都察院右僉都御史賑濟淮揚等處饑荒本年事竣回院詳都察院

林聰字季聰福建福寧州寧德縣人天順三年以右副都御史捕江淮郡盜擒其巨魁梟示脇從則用輕典盜以寧息成化二

年江淮旱人相食 命以都察院右副都御史賑濟奏借江南糧及支運糧儲數十萬以給民且與之種本年回院歷官刑部尚書詳刑部

吳琛字輿璧直隸太平府繁昌縣人成化元年以都察院右僉都御史賑濟淮揚等處饑荒凡事有益於民者率以便宜行之而言多切直大忤權貴雖民賴以濟而謗益滋矣二年回院歷官總督兩廣軍務右副都御史詳兩廣

馬顯字文明直隸廣平人成化六年以南京兵部右侍郎巡視鳳陽等郡撫窮獨擊奸慝民賴安堵

喬毅字

山西樂安人成化七年以工部右侍郎督淮揚漕

運

王璟字

山東沂州人弘治十四年以右僉都御史理兩淮

鹽法通變革奸私販屏跡十六年賑濟浙東

何鑑字世光浙江新昌人弘治十四年以刑部左侍郎賑濟山東兗州等府直隸徐邳等州荒旱

王華字

浙江紹興府餘姚縣人弘治十六年以南京吏部

右侍郎賑濟淮揚等處饑荒本年回部歷南京吏部尚書詳南京吏部

王瓊字德華山西太原人正德元年以右副都御史總督鹽法

二年改督漕運歷吏部尚書詳吏部

叢蘭見總漕正德七年以戶部侍郎兼僉都御史賑濟八年改督宣大軍餉

席書字文同四川瀘川州遂寧縣人嘉靖二年以南京兵部右侍郎賑濟淮揚等處饑荒本年回部詳內閣

劉玉字 江西萬安人弘治丙辰進士嘉靖三年以刑部右侍郎兼左僉都御史賑濟淮揚詳刑部

黃臣字 山東濟陽人正德辛未進士十四年以諫止巡遊

謫官十六年 世廟卽位復其官嘉靖元年命陞俸一級進刑科右給事中二年時都察院疏請差御史巡鹽批答稍誤以未下閣臣票擬也臣諫曰我朝設立內閣處以文學之臣凡百章

奏先行稟擬令使內閣虛代言之職中貴肆專擅之奸關係匪輕漸不可長容臣封還原本以重命令疏入卽改批如制陞工科郎給事中五年真人張彥頤以府第被災請賜更造上從其請命有司作治遣內臣一人往督之於是臣等言頃者趙秦榮三王府災第詔行勘估計未嘗輕動土木誠愛民節用至意也今彥頤所請未經勘估輒以煩有司且遣中官往督是陛下優容假借於彥頤者顧出親王之上也昔漢樂巴嘆酒殿廷而成都火滅今陛下謂彥頤有道術而曾不能救其家之燬將焉用之請勿遽遣內臣下工部行勘估計便詔如前旨十三年任都察院右副都御史巡撫陝西十五年改總理兩淮鹽法

年回籍

王璣字在教浙江西安人嘉靖己丑進士三十年以都察院右僉都御史提督徐充農田三十二年回籍

王紳字子書直隸滄州人嘉靖己丑進士歷光祿寺少卿三十年陞順天府丞本年以都察院右僉都御史總理兩淮及浙江等處鹽法三十二年回籍

吳鵬字萬里浙江秀水人嘉靖三十二年以刑部侍郎賑徐邳饑民詳吏部尚書

朱衡字士南江西萬安人嘉靖四十四年以工部尚書兼都察院右副都御史總理河道漕運

江北撫臣行實

夫撫臣非奉漕命然巡撫淮南實總漕巡撫之端故別著於首云

曹弘字

湖廣長沙府益陽縣人永樂乙未進士授刑部

司主事遷本司員外郎宣德五年初設巡撫以大臣薦陞刑部右侍郎巡撫淮南并山東等處地方時連歲饑荒人多餓死弘至驗其地之肥瘠豐凶均徭役儲粟穀給賑濟俵牛種簡孳檢緝婚禮諸所設施咸切民隱民甚德之正統二年卒於官

王永和字以正直隸蘇州府崑山縣人永樂甲午鄉薦任兵科都給事中正統八年以工部右侍郎巡撫十年回部十三年命

治徐州呂梁二洪本年回部詳工部

薛希璵字廷器浙江處州府麗水縣人正統十年以刑部右侍郎巡撫淮安等處并畿內保定等十二府興利除害軍民樂業十三年賑鳳陽饑民十四年改鎮福建累官南京刑部尚書詳南京刑部

趙新字日新浙江杭州府富陽縣靈峰人永樂乙酉舉人入國子監與修永樂大典十一年授工部屯田司主事二十一年陞吏部稽勲司郎中宣德五年吏部止有尚書蹇義左右侍郎久缺後蹇奏保文選郎中鄭誠陞右侍郎新事蹇媚且久因觖望言於蹇曰鄭誠做得趙新如何做不得蹇欲奏難於衆論久之

因江西稅糧逋負假以巡撫爲名保陞十二人爲侍郎新遂陞吏部右侍郎巡撫江西討平蠻寇察吏治詢民瘼時耕穫定征斂蠲浮費又勸民出粟賑濟饑民如吉水曾希恭胡有初等廬陵陳讓等各以出穀千石奏聞於上賜璽書賜褒爲義民遣行人賚勞仍命有司復其家又建議以漕淮之舟順載江西之粟兵農兩利每歲秋入覲及還執政少師楊文貞文敏少傅王文端等各賦詩紀其績正統四年還朝調吏部右侍郎蒞事南京掌部事六年詔天下教官員缺旣多監生能作三場文字考選充之於是新同南京禮部右侍郎陳璉會祭酒陳敬宗掄選本年十月調南京禮部右侍郎時尚書省革新掌部事

一切禮文學校裁處有方七年給由復職九月思父在家年九十一歲具疏陳情准給假回籍八年正月復任二月丁父憂十年十月起復仍改吏部右侍郎怙勢自用時考功郎中彭勗負時名行事公直不可私干與新不合新面以言誘之勗曰勗所知守成憲以合公論耳若徇時干位非素志也遂奏勗學行雖優疎於吏牘宜調爲郡不報已而竟用闕補山東按察司副使士論不能平尚書王文端雖極知重之被其挾制而莫能主也十三年江淮多事出爲巡撫山東并淮安等府十四年敘前後九年考滿加吏部尚書仍舊巡撫景泰二年養病卒於道

總漕撫臣行實

王竑字公度陝西河州衛人正統己未進士擢戶科給事中歷都察院右僉都御史景泰二年因漕運不繼非專官不足以一人心轄百司特命竑總督漕運與總兵官叅將同理其事自通州至揚州水利有當蓄洩者督所司行之該戶部題該吏科給事中李瓚題淮揚廬鳳四府徐和滁三州就令竑兼管巡撫監督常盈倉糧儲既至政先鋤奸墨貪吏聞風多遁去其逮問者無所寬假悉置諸法間閭豪右夙肆橫侵者必捕罪之由是戢戒毋輒犯一時吏民咸畏其威如神明然天順元年追論廷擊事放歸公時按廣陵得報從容自如解衣市小舟以行五年起用經略陝西尋改蒞淮揚適歲大饑卽先發漕米數萬石賑後

乃具疏劾罪又先任曾與江南巡撫周忱會借餘米十萬石以足民食二公皆先發後聞今江淮人稱名巡撫必曰王公周公者蓋以一時二公忠愛才力俱不可及云

陳泰字吉亨福建邵武府光澤縣人儀度修整言簡而有章淹貫經史喜爲詩永樂癸卯發解鄉闈宣德丁未會試乙榜除直隸安慶府學訓導以得教育英才爲樂正統丁巳廷臣交章薦其賢擢爲江西道監察御史累奉命巡按貴州山西山東諸藩克振風紀奕奕有重名在貴州都指揮官聚素桀驁聞泰至不敢肆其奸大軍征麓川歲取士兵二千爲鄉導將士或失利輒殺士兵以爲功泰奏罷之夷人仰戴如父母越數月召還調

陝西道各道有疑獄皆以決於秦無或稱寬者在山西會南北
圻旱澇相仍 詔下求直言衆皆以爲天災秦獨言洪範庶徵
皆由人事乞罷大臣不職者以格休徵於是都御史陳智侍郎
李庸祭酒貝秦御史成 等皆罷去又奏舉山西藩憲及州縣
官之貪殘者悉置之法在東藩以憲多匪人陳疏懇懇數千言
大要以選賢去奸爲治本 上嘉納之擢爲四川按察司按察
使不踰年而蜀大治鎮守都御史寇深忌其才名陰諷所私叅
議陳 誣奏秦杖殺人下刑部獄其人實自溺水死久而始白
復官已巳虜寇內侵命協同將臣守備紫荆關及巡視沿邊諸
寨景泰改元陞大理寺右少卿守備白洋口轉都察院右僉都

御史鎮守易州節制紫荆倒馬等關及沿河關口三十六處泰
早夜究心畫計忘其勞虜知有備遂遁去及考察大名廣平順
德河間諸府衛官吏去留咸當人心旣而三上章辭位不聽命
益勵勤以圖報稱甲戌陞左僉都御史疏理徐州呂梁二洪及
臨清濟寧諸處河道丙子巡撫蘇松常鎮及嘉湖諸大郡泰蒞
下嚴而不苟爲政清明吏不能高下其手以侮公法天順改元
以讒言左遷廣東按察司副使連丁父母憂去壬午服闋復左
僉都御史加賞資巡撫四川蜀中老穉皆熟泰名聞泰至奔走
相賀曰陳憲使復來矣蜀其將安以嬉乎州郡望風解組者數
百人甲申陞右副都御史巡撫淮揚等處兼督漕運軍民皆安

之成化改元止章乞歸辭甚切

上念其効勞有年賜允薦紳

大夫宴餞於都亭車蓋塞途都人聚觀以爲榮家居五年卒所著詩文有拙庵集奏議藁武陽志藏於家

蘇志云景泰七年陳公泰以右僉都御史巡撫知免雜之詔恩未得均又富室田多輒額其重者多在貧下乃推廣調停之令以五升之田倍其賦而官田之重者止取正額於是澤始均而賦額不損上下咸便而富者亦不怨也

滕昭字自明河南汝州人正統辛酉舉人任巡撫遼東左僉都御史成化二年以都察院右副都御史總督漕運兼撫鳳陽等府地方忌勢下賢官庶服其威量所部連歲大饑加意賑貸額

以全活者數十餘萬人又奏准瓜淮水次允運官軍下年俱過江就各水次允運六年改撫福建歷官兵部左侍郎詳兵部

陳濂字德清浙江寧波府鄞縣人正統乙丑進士授南京刑部主事明習文法一如素官時有鎮海戍卒故亡賴誣衛指揮以下數十輩不法事同獄者又代爲僞帖以質其奸株連逮繫乃以屬濂遂得其情法僞帖者而釋其餘譽益用起已乃署員外郎事景泰三年陞廣東按察司僉事天順三年轉副使巡視海道海故盜藪而圍山又瀕海盜勢猖獗濂輒親冒矢石出奇應變日夜露禱誓不與賊俱生忽雷電交作风雨晦冥盜迷瞢相擊殺俘馘無算海南肅然成化元年陞廣東左布政使四年陞

巡撫廣東右副都御史廣人頂益欣戴頌聲大作時連歲兵興供應師旅勞止日甚慊懇懇矜惻如或傷之五年奉命總督漕運晝作夜惟勤疏濬嚴監督立程度輸運無後期兩淮故南北孔道諸豪家漁獵貲貨率多橫暴凌啖庶姓悉裁以法善良咸獲其所七年丁內艱去八年適河南缺巡撫上謂非濂不可者詔起復濂灑泣就道未幾又命巡撫北直隸兼巡紫荆諸要害九年上又以漕運事重還濂原任比至淮疾作卒於蘇張鵬字騰霄直隸保定府淶水縣人景泰辛未進士由御史陞福建按察使成化四年陞巡撫廣西右僉都御史改理南院七年以左僉都御史總督漕運巡撫奏准運糧軍缺許於成操雜

差內選補八年盜發境內專命巡撫以恩信爲治緝捕有方踰年盜息仍理南院事後歷兵部尚書詳兵部

李裕字咨德江西豐城縣人景泰甲戌進士任順天府尹成化十年以都察院右副都御史總漕運兼理巡撫綱運利弊罷行殆盡數運之後人人稱便張秋南旺湖淮安西湖諸防舊用椿木以捍衝激屢修屢壞費無已時裕檄郎中楊禁主事郭昇易之以石利垂永久又請議疏濬通州至京大通河道十四年丁憂累官吏部尚書詳吏部

李綱字廷張山東濟南府長清人幼自負志挺特不與凡兒狎讀書日記數千言下筆爲文不竊陳腐視世之侈靡者若將浼

已嘗侍父州判君來京家僮驅車行狹道中偶失脚墜轍下車
從身積過衆以爲必無全理已而不傷若有神護持之者識者
曰大難無危後當遠到此其兆也旣歸補邑庠弟子員景泰癸
酉以詩經領鄉薦天順丁丑登進士授山西道監察御史慨然
以功業自期明憲綱究律意舉大體略細故疏陳時政得失無
所迴避其出巡南直隸浙江等處所至舉廉能黜奸貪風聲大
振淮人有宦族子婦私通武弁子弟逾年情衰以強訴之時王
巡撫威望嚴重訊問未畢子弟自誣服後綱按其事疑之詰其
所自乃得實益前此嘗分艾灸指爲盟索瘢視之宛然相對遂
得減律不死在浙江時去賊吏四百餘人至有望風解纜至今

士大夫猶能道其事曰爲鐵御史嘗奉勅於陝西延綏編集
土兵夷人性悍激之則變獨處置得宜得其心事竣回京陞太
僕寺少卿未三載馬政之弊革除殆盡時有幕職某人者素嗜
榮進累托中使能吹噓禍福者迫薦爲本寺丞綱毅然拒之終
不從出視馬政於真保定諸郡有司不敢飲一錢於民自府察
以下事不集者咎之行冀州道劇賊驅騎卒至乃從容解前馳
衣箱并鑰與之相去未百步賊指隸人曰此豈太僕寺李某耶
隸人曰然衆賊曰無錢無錢遂不開箱上馬徘徊有退謝之狀
未幾聞母喪守制於家上遣官諭祭州判君相繼物故前後
居六載喪事一依古禮足跡未嘗出門卽吉轉都察院右僉都

御史綱素請憲事凡疏奏必取省閱會總督漕運都憲員缺陞
左僉都御史賜勅俾行至淮奏准運船遭風漂流糧米者免
送問未及二載運事畢舉入用大和至成化己亥六月三日以
疾卒平江伯陳公卽淮安公館具棺斂如禮啟其箱視之惟敝
衣數事而已他無一物陳公曰真君子人也爲上章乞葬祭許
之得壽五十有五

張瓚字宗器湖廣德安府孝感人正統丁卯鄉試明年第進士
己巳拜工部虞衡司主事甚有聲稱從右尚書璞督餉山西河
南又從趙侍郎仁塞決河於山東沙灣裨益甚多二公才之湖
廣白糧稅非土產爲患甚乃奏移於蘇松鄉民至今賴之遷郎

中令京畿民餓奏賑之而民大悅天順庚辰山陰武原鄉以
以募去服闋改浙之寧波首定徭役法每十年而一變第其等
有差於民其便監市舶中官福住怙勢黷貨民國堪命乃疏其
罪而福住爲之奪氣反中以計章下監司幸以白而福住亦幸
免其黨俱伏法成化丙戌遷廣東布政司參政專總鹽儲積弊
久不能除請勅命軍衛有司悉聽裁處由是不律者始得繩
之以法詔天下總糧者以此爲例嗣六載遷浙江左布政使
凡百利病悉興革之士民胥服甲午遷都察院右副都御史撫
臨四川首條禁約數十事榜於通衢切中民隱播州太壩灣溪
等所自正統中征之未服乃分遣宣慰使楊輝進攻斬首先後

計四百九十六級破十六寨餘諸苗素居化外者亦望風納款
降其衆一萬三千八百餘人相其要會置官司以控制之凱旋
乞歸省母得告卽行行至長壽聞喪會潘茂西番寇邊西鄙繹
騷詔特起征之卽累衰而往偕副總兵某相機征勦無何黃
草壩暨龍州諸寨以次報平其任昌等四十五族不煩兵而下
惟西坡等處負固寇擾如故進兵撲之破其七寨於是潘茂悉
定奏功計破虜寨二十二斬首一千七十級俘獲人畜器械無
算隨處修葺橋棧增築墩堡皆堅久之制又移築茂城於舊城
南演武場廣更加倍於舊居兵民若千家己亥夏四月告成於
上仍終制於鄉五月召拜戶部左侍郎懇辭服闋改都察院左副

都御史命巡撫鳳陽軍人安焉尋以疾歿壽僅五十有五好學不倦所著詩文有土苴內外集議奏東征紀行錄征夷雜記又嘗刊程氏遺書伊洛淵源錄今盛行於世

徐英字時傑四川潼川州中江縣人天順丁丑進士授禮科給事中歷科左給事中吏科都給事中成化十四年陞順天府丞歷河南右布政使轉左十九年陞都察院右副都御史總督漕運兼理巡撫奏復漕運理刑官二十年致仕

劉璋字廷信福建南平縣人天順丁丑進士累官浙江左布政使成化二十年以右副都御史總漕運兼理巡撫時河南數州饑饉戶部主事張倫上言宋之漕運皆由黃河以達於汴今宜

做此法漕運河之米往賑之有 旨命倫督運十萬石璋督運
十七萬石倫蓋不知宋之漕運江不入淮淮不入汴以黃河之
險非江淮之舟所能濟也璋乃選巨艘而高大其航檣募習黃
河之水者操之通運二十七萬以往尋復奉 勅巡撫鳳陽等
處既而湖廣鄖陽流民囂聚 朝廷恐其滋蔓特 勅璋往撫
治之詳工部

馬文升字負圖河南開封府鉅州人景泰辛未進士授御史累
官兵部左侍郎以守正忤太監汪直謫戍重慶後從言官交薦
起撫遼東樹奇績成化二十一年陞右都御史總督漕運兼理
巡撫搜剔宿弊門無私謁於是逋逃之卒聞風皆歸未期陞兵

部尚書詳兵部

李敏字公勉河南開封府襄城縣人景泰甲戌進士授山東道監察御史累官兵部右侍郎養病成化二十二年起右副都御史巡撫保定提督紫荆等關二十二年改總督漕運兼理巡撫政績安詳累官戶部尚書詳戶部

丘鼎字宗用初姓周江西廣信府貴溪縣人浙江右叅政旭鑑之孫也景泰甲戌進士成化二十一年陞

四川按察使二十三年陞右僉都御史巡撫四川地方本年陞都察院右副都御史總督漕運兼理巡撫弘治元年致仕

秦紘字世纓山東兗州府單縣人景泰辛未進士授南京山西

道監察御史累官戶部右侍郎以忤時貴降廣西左叅政弘治
元年太宰三原王端毅公素重其剛正特起左副都御史總督
漕運益侃侃自樹風采嶄然會御史姜洪巡按湖廣令布政司
抄案轉行湖廣稅糧事絃奏洪犯分刑科給事中陳璠等駁論
絃恕已不明十三道御史論絃剛愎上以事干大體俱罰俸
又令禮部會議調洪知縣說者謂朝廷處置洪等有體而絃
所執奏亦關於憲體云未幾兩廣缺總制進右都御史總制兩
廣兼理巡撫累官詳戶部

李昂字文舉浙江杭州府仁和縣人景泰甲戌進士除工部都
水司主事改兵部車駕司陞山東青州府知府年始二十有一

以其少未更事爲慮至則廢政悉舉郡中稱治凡八年闢田至
五千七百餘頃賑饑民百二十萬而復業者五萬二千五百將
滿去民狀政績三十有四事上於巡撫大臣願留終惠一郡俄
陞福建布政司右叅政民懷思不已刻像於表海亭列邑皆祠
祀或有冤不得申者輒走祠下愬之其得民如此丁內艱服除
改山東尋進右布政使舊治民鼓舞而迎者載道再轉河南左
布政使時值歲歉悉力賑恤又吏弊多端作吏範門約禁典以
戒飭之四月適江西盜起贛州聚衆劫掠會昌信豐諸縣殺郡
縣官其勢甚熾遂擢都察院右副都御史以往時官吏因循多
不用命痛繩以法乃議立營堡壓賊巢穴使不能出別募勇敢

士與民同操習已而進兵賊聞風皆披靡斬獲不可勝數事聞朝廷賜勅獎諭昂以今賊雖滅當立守禦計蓋會昌與福建接境萬山阻絕爲上杭武平流賊所聚雖嘗有兵守禦而寡弱不支宜卽會昌武平立行都司以統諸衛乃創巡檢司於龍南要地庶得無虞奏上皆從之賊平疏乞致仕不從移總督漕運兼巡撫鳳陽等府地方以國重務推究其利弊而罷行之以江西怨家騰謗去位昂爲人精勤明敏才氣沛然遇事能爲若無難者性尤孝友每恨早孤語及其父輒嗚咽不已奉母夫人能盡色養事兄及二姊恭謹其賢又可稱也素好文翰所著述多有可觀有文集四卷奏議三卷藏於家

張瑋字汝器直隸河間府景州人成化丙戌進士擢監察御史
性剛介寡言笑舉彈無所避十五年己亥擢陝西副使政尚嚴
不事姑息弘治二年以督餉有功陞都察院右副都御史巡撫
寧夏三年改總督漕運兼理巡撫七年致仕進階正治上卿卒
於家

李蕙字德馨直隸太平府當塗縣人成化己丑進士觀政大理
寺明年會給事中員缺選刑科居數月適京師米貴 詔發倉
儲五十萬石分官監糶以平其價民擁道不時得米蕙蒞通州
倉設法以給糶者人皆稱便才名始起後再偕中官給賞軍士
衣巾等物能革宿弊仍條陳給賞新格以上 詔行其言戊戌

丁母憂服除還任壬寅擢江西布政司右叅議時有中貴怙勢挾憮人徧歷南方索寶玩行至江西憲抵任適三日方分守南昌道卽偕行列郡耳民窮困激之恐生變中貴聞之斂威一時民不大擾歲滿分守嶺北更守湖東斷事皆如神民益稱頌在湖東時上饒饑民數人乞米於富家不得遂強取之郡捕其人以盜論憲曰此輩迫於饑出於不得已然耳悉薄其罪恐長亂不可特罪其爲首者餘從末減獄始平後四年南贛盜發巡撫大臣議發兵勦除以憲舊有善政服其民且熟知地形險易檄憲行至則令駐兵傍縣白於大臣曰前許諸盜自新此舉非詔意今宜招撫之使不從用兵未晚也用其言賊黨相率散去惟

獲渠魁數人戮以示戒而已事聞蒙厚賚弘治戊申擢本司左
叅政有薦其才可大用者遂擢山西右布政使踰年轉左布政
使初本司公文出入吏緣爲奸莫能窮其故至則痛治之而奸
弊始悉改乃因俗爲治惠澤多及於民有畫像以奉之者癸丑
陞都察院右副都御史總督南京糧儲明年 朝廷以漕運事
弛當易其人遂轉左副都御史兼巡撫四府故事天下巡撫官
凡有利弊具疏奏上歲八月畢至京會議後其地或有水旱盜
賊等事多不至惟總督漕運者至如常前後所上二十餘疏得
與部院諸大臣可否事多施行內如奏定江南造船料價期限
并定運糧軍職勤惰衛所不補運軍分數叅問之例及運糧逃

軍問發沿邊守墩瞭哨江西湖廣僻遠山縣允運糧米折銀給
軍爲輕齎外江漂流糧船有司勘實免送問久雨違限運官免
叅問與夫衛所掌印官監同運糧委官徵收減存運軍該辦料
銀俱情法兼盡軍士困於運輸者方幸稍蘇久之拜右都御史
以褒嘉之而俾總督巡撫如故更遣中使賜以寶鈔羊酒以
勞之又二年卒於官爲人疏達明敏遇事能變通法務平恕入
仕三十年尤以廉謹自持人無可議者居家事母孝母病必躬
扶持久而不倦待二弟有恩季父異爨已久後稍貴復請居同
養之至人有德於己雖在幼時終身不忘其心之厚如此平生
喜交游好吟咏與士大夫文翰往來動盈卷帙有粹英集藏於

家

徐鏞字用和湖廣武昌府興國州人登成化己丑進士第授行人拜監察御史巡視通州時濬大通河鏞獨疏不可旣而漕舟果不達按閩還以災異論列却貢獻正課程革奸弊均食四事臺長重之與同官共劾小人之附權臣者又極論名器之濫清汰冗官會星變請免慶成宴謫鎮原令值歲饑修預備倉掘地得窖錢十萬大周貧乏及代流亡輸累歲逋課改臨潼父老泣送之弘治二年薦舉起陞淮安府知府值歲大稔積雪凝凍民間食絕鏞亟修糴賑之法循行郡邑勘課農桑歲遂大豐民孤獨無告及不能婚葬者諭富室助之郡學荒圯修葺恢擴之八

年陞廣西右叅政十一年陞河南右布政使本年陞河南左布政使十二年陞都察院右副都御史總督漕運巡撫奏准借太倉銀應水陸搬運腳價用本年卒於官准入祀之名宦名臣二祠

張敷華字公實號介庵江西安福縣人天順甲申進士改庶吉士弘治九年歷南京兵部右侍郎十三年陞都察院右都御史總督漕運首黜武臣部運尤無良者權貴于請悉拒弗納近例漕司多假太倉官銀少免利息敷華謂逋負乃下剝上攘所致而官爲借貸大非政體峻爲之禁高郵諸湖隄久且壞乃爲深溝數道以緩湖水寶應地多平侈又趣令築隄隄成而水至又

奏准江西南兌糧折銀二十五萬石每石六錢又因久雨奏改京倉糧五十萬石於通倉收又因運河爭競奏准軍民運船與王府官校船兩岸分行十四年改南京都察院右都御史掌院事歷左都御史掌院事詳都察院

張縉字朝用山西太原府陽曲縣人成化己丑進士初知鈞州以內艱歸終喪改知滄州居南北之衝且頻病雨潦多方賑救民賴之安權貴欲請境內地爲莊田縉不可其事乃寢陞南京工部郎中剷除宿弊羣臣故囊橐爲奸利者無所容未三年陞杭州府知府在郡八年節縮百費省民財十有餘萬陞山東叅政弘治癸丑河決張秋上命平江伯陳銳都御史劉大夏治

之百需悉委調度及功成遂陞其秩爲通政司右通政屬之行
河時衝決之餘溝防不治縉相其緩急以漸修濬無所遺又於
決口之東甃石岸數里以圖勿壞又新築南旺東堤樹柳其上
每歲夏秋水溢挽卒得分行無阻至今便之庚申八月陞都察
院右僉都御史巡撫保定等府疏陳八事皆切民病辛酉四月
陞右副都御史巡撫宣府虜入遮擊屢有斬獲之功是歲十一
月改督漕運造船之價必預給漕卒必選其精壯者補之癸亥
甲子淮揚連歲告饑奏留糧米若干萬石所全活者甚衆丙寅
陞戶部左侍郎時逆瑾惡不已附者會南京戶部尚書缺以縉
往補而卽因事逮之時同逮皆復官惟縉致仕過滄滄人留止

之乃家於滄然瑾銜縉未釋也復與尚書韓文同下詔獄郡輸
邊米五百石又坐前揚州災嘗改兌運二萬五千石於鳳陽上
納瑾以爲更制除其名未幾復召爲右都御史仍督漕運兼淮
南勦賊事至則選鋒追勦又設伏以遏其衝賊圍邳縉素知東
海千戶張瀛者以謀勇稱遂令率健士開南柵迎敵有三騎突
來蓋賊魁也皆中矢斃其黨遁去城乃完七月賊捨騎入江縉
於儀真於瓜洲皆嚴兵以待旣而賊平 上勞以璽書金帛時
境內累經兵燹民物凋瘵又加意撫綏漸有生意然縉亦老已
倦於勤矣凡七疏乞休不允甲戌以入議至滄不進復疏乃許
之仍復南京戶部尚書致仕詳南京戶部

洪鍾字宜之浙江錢塘人成化乙未進士授官刑部主事諳習
憲典聲聞驟起庚子陞員外郎癸卯丁內艱丙午起復陞郎中
尋慮囚山西丁未江西福建流賊甫定承 命往審處之歸言
宜及平時立社學以訓誨其子弟銷其兵器易之以詩書禮讓
庶幾潛化其奸宄時以爲知本之論弘治乙酉陞江西按察司
副使癸丑陞四川按察使所在聽決如流庭無宿訟山是豪橫
屏息自土宦宜慰司皆懍懍奉約束安民世有馬湖驕僭爲地
方患從容畫策去之請更於 朝遂以帖定丙辰陞江西右布
政使丁巳轉福建左布政使著績兩省戊午陞都察院右副都
御史巡撫順天等府兼整飭薊州諸邊滿增築邊牆自山海關

界嶺口直抵居庸延亘千餘里繕復城堡二百七十悉城沿邊諸縣官無浪費而民不一分奏減防秋官兵六千人歲省賞以數萬創建浮橋以利病涉毀永平陶窰以息軍民橫役之苦奪民產及牧圉草場之人於權貴者而悉還之遠近大悅名稱籍甚然權貴人之扼勢失利者數短於上遂改雲南巡撫再改貴州頃之召還督理漕運兼巡撫鳳陽諸處正德丁卯陞右都御史仍董漕政戊辰命掌南京都察院事詳都察院

王瓊字德華山西太原府太原縣人成化甲辰進士授工部屯田司主事弘治四年陞屯田司員外郎六年陞都水司郎中九年改戶部陝西司郎中十二年陞山東右叅政十四年守制十

六年補河南左叅政十八年陞河南右布政使正德元年陞都察院右副都御史整理兩淮鹽法二年取回本年改總督漕運未任尋陞戶部右侍郎累官吏部尚書詳吏部

李瀚字叔淵山西澤州沁水縣人成化辛丑進士十八年授樂亭知縣二十二年行取擢四川道監察御史弘治四年丁憂七年起復補浙江道監察御史十二年陞湖廣副使十三年丁憂十六年起復補河南副使十八年陞湖廣按察使正德二年陞河南右布政使尋轉本司左布政使本年五月歷順天府尹本年九月陞都察院右副都御史總督漕運三年陞本院左副都御史佐理院事詳戶部

邵寶字國賢直隸無錫縣人成化甲辰進士授許州知州能以禮讓爲國所舉動多風教事作新廟學毀龍骨杖妖巫尤急民事躬課農種倣朱文公社倉立積散法行計口給田法爲備荒計釐正糧籍民至於今稱便弘治七年徵爲戶部員外郎十年進郎中操履清潔不可干以私政暇錄戶部條例并各處荒歉數目備記不遺而恤民隱惜財用朝省諮議多采之十三年推陞江西提學副使至則以身爲教先行檢而後辭藝黜浮崇雅士類勃興十八年陞浙江按察使正德二年陞浙江右布政使三年轉湖廣左布政使鎮靜簡重足以革浮靡消澆訕而聲望益隆四年陞都察院左副都御史總督漕運時劉瑾用事一無

所通瑾銜之數令以危言撼之乞不爲動勒令致仕詳南京禮

部

屈直字

陝西西安府華陰縣人成化甲辰進士授刑部

司主事歷

司員外郎

司郎中十年陞重慶府知府

正德元年陞河南左叅政二年陞浙江按察使三年陞河南左
布政使未任本年陞太僕寺卿尋陞都察院右副都御史總督
南京糧儲四年陞南京大理寺卿本年改都察院左副都御史
總督漕運兼理巡撫乞致仕未任

陶琰字廷信山西平陽府絳州人成化辛丑進士正德五年以
閑住刑部右侍郎起左副都御史任單車至鎮廉幸豎官民之

豪猾者悉治以法權勢歛手來往淮上者常廩之外毫不少假
榜諭以法又自率以勤廉六年遷南京刑部右侍郎九年以右
都御史再任七疏求歸十年得 旨致仕十六年仍以右都再
任進戶部尚書兼左副都御史仍任嘉靖元年遷工部尚書去
之日淮民傾城出送易履以著去思歷南京兵部尚書詳南京
兵部

叢蘭字廷秀山東登州府文登縣人正德十年以右都御史任
兼撫鳳陽諸郡蒐剔宿弊改立條約著漕運錄權右以私貸訴
償不理毀之十三年革漕運專理巡撫值歲饑截漕粟數萬益
以倉賑之主事壬鑾忤中貴史宣逮獄疏白之中官劉允迎佛

使不與見疏乞斥雲老止允勿遣十五年陞南京工部尚書詳

南京工部

臧鳳字瑞周山東兗州府曲阜縣人弘治庚戌進士授知浙江
嵯縣累官河南左布政使陞巡撫順天左副都御史正德十三
年以右副都御史專督漕運以漕政久弛悉心經畫選能以任
功剔蠹以祛害十六年改兼理巡撫奏免常租裁縮冗費本年
遷刑部右侍郎歷南京刑部尚書詳南京刑部


許庭光字

河南開封府河陰縣人弘治己未進士歷巡視

浙江右僉都御史正德十六年以右副都御史專理漕運未至
改巡撫四川詳四川巡撫

俞諫字良佐浙江嚴州府桐廬縣人弘治庚戌進士歷巡撫江西右都御史乞休嘉靖元年起右都御史任兼巡撫至則清冤獄黜貪吏所至肅然思減推挽之費疏請三分折一上下稱便寶應湖水蕩囑堤岸命植茭蒲其側水患以平歲饑發粟賑濟全活甚衆河南賊寇淮西下車未半月平之有司誣良民爲功者審釋之二年回院掌都察院事詳都察院

胡鉞字

直隸大名府長垣縣人弘治己未進士嘉靖二年

以右副都御史任三年遷南院歷南京戶部右侍郎詳南京戶部

李鉞字虔甫河南開封府祥符縣人弘治丙辰進士正德十一

年任巡撫山西右僉都御史十三年回院嘉靖三年以右都御史任本年回都察院四年歷兵部尚書詳兵部

高友璣字肅政浙江樂清縣人弘治庚戌進士除南刑部主事歷南京刑部右侍郎嘉靖四年以右都御史任討誅鹽徒渠惡而招徠其衆革驛傳費一清宿弊六年陞南京工部尚書歷刑部尚書詳刑部

鄭毅字

嘉

江西廣信府上饒縣人弘治己未進士授南兵部

職方主事歷浙江左布政使嘉靖六年以四川巡撫右副都御史改調南院遷督漕運未任致仕詳四川巡撫

唐龍字虞佐浙江金華府蘭谿縣人嘉靖七年任太僕寺卿

都察院左僉都御史任首領吏誠以儆有位據利病之大者奏請興革之漕政久弛隨宜修治奏縮馳驛者之供索奏折徵官馬省費十五奏免正陽之榷稅通泰無田之子粒漕卒之船料承命慮囚多所平反釋輕罪二千餘本年陞都察院右副都御史歷吏部尚書

毛思義字子山東濟南府陽信縣人弘治壬戌進士嘉靖八年以右副都御史任九年改總理糧儲兼巡撫應天等處地方詳總理糧儲

陳祥字子江西瑞州府高安縣人弘治壬戌進士嘉靖九年以巡撫應天右副都御史改調前職未任被劾聽勘詳前任總

理糧儲

劉節字介夫江西南安府大庾縣人弘治乙丑進士正德八年任四川提學僉事十五年任廣西提學副使嘉靖八年任巡撫山東右副都御史九年以原官遷任十一年遷刑部右侍郎詳刑部

馬卿字敬臣河南彰德府林縣人弘治乙丑進士改翰林院庶吉士正德二年除戶科給事中五年陞吏科右給事中本年陞工科左給事中六年陞大名府知府十年陞浙江副使十二年改山西提學十四年陞山右叅政嘉靖二年陞浙江右布政使四年降鶴慶府知府七年陞雲南左叅政本年陞雲南按察

使尋陞福建右布政使八年陞南京太僕寺卿本年丁憂十一年起光祿寺卿陞都察院右副都御史總督漕運兼理巡撫十五年卒於官

周金宇

直隸常州府武進縣人正德戊辰進士任戶科都

給事中十一年陞太僕寺少卿嘉靖元年以都察院右僉都御史巡撫延綏四年改撫宣府本年加右副都仍任六年致仕十二年以原官起撫保定十四年陞兵部右侍郎十五年以右都御史任十七年加左都御史仍任前職二十年陞南京刑部尚書改南京戶部尚書詳南京戶部

王昊宇

山東兗州府汶上縣人正德甲戌進士歷浙江道

御史嘉靖十二年陞太僕寺少卿十四年陞大理寺右少卿十五年陞都察院右僉都御史十六年轉左十八年陞左副都御史本年陞戶部右侍郎二十年陞總督漕運右都御史二十一年陞戶部尚書加太子少保詳戶部

張景華字

山東兗州府剡城縣人正德甲戌進士除吉水

縣知縣十三年丁憂十六年起復陞河南道監察御史嘉靖八年養病九年復原職十年陞大理寺右寺丞十三年陞謄黃右通政本年陞都察院右僉都御史巡撫順天等處地方十四年致仕二十年起用補都察院右副都御史佐理院事二十一年改本院左副都御史總督漕運兼理巡撫二十三年被劾閑住

周用字行之真隸蘇州府吳江縣人弘治壬戌進士嘉靖二十三年以工部尚書兼右都御史治河改任本年改都察院左都御史掌院事歷吏部尚書加太子少保詳吏部

王暉字克明應天府句容縣人正德丁丑進士歷南京光祿寺少卿嘉靖十二年陞太僕寺少卿十六年陞光祿寺卿十七年陞南京太常寺卿十八年陞巡撫江西右副都御史二十年陞南京戶部右侍郎未任二十一年陞戶部右侍郎二十二年轉左二十三年陞總督漕運右都御史二十五年陞總儲戶部尚書詳戶部

喻茂堅字

四川重慶府榮昌縣人正德辛未進士任

道御史嘉靖二十一年任撫治鄖陽右副都御史二十一年改撫
應天二十二年任南京大理寺卿二十五年以右都御史任二
十六年陞刑部尚書詳刑部

歐陽必進字任夫江西吉安府安福縣人正德丁丑進士嘉靖
二十六年以巡撫應天右副都御史改任本年改兩廣歷南京
右都工部尚書都察院左都少保兼太子太保吏部尚書詳吏
部

韓士英字 四川順慶府南充縣人正德甲戌進士嘉靖二
十六年以右都御史任二十七年陞南京戶部尚書歷南京兵
部改戶部尚書未任詳南京兵部

胡松字直隸徽州府績溪縣人正德甲戌進士嘉靖二十六年任河道右副都二十七年改任本年陞戶部右侍郎二十九年轉左本年歷工部尚書詳工部

龔輝字實卿浙江紹興府餘姚縣人嘉靖癸未進士二十九年陞工部右侍郎調南京工部乞致仕詳工部

魏有本字曰深浙江紹興府餘姚縣人正德辛巳進士嘉靖十四年任大理寺右寺丞十五年轉左十八年陞本寺右少卿十九年陞巡撫河南右僉都御史二十一年陞總儲右副都御史二十三年陞南京大理寺卿二十七年陞南京刑部右侍郎二

十九年推右都御史總漕未任以前任南京刑部侍郎乞致仕
詳南京刑部

何鰲字

浙江紹興府山陰縣人正德丁丑進士任御史嘉

靖二十五年歷巡撫山東右副都御史二十六年逮獄謫福建
叅議二十七年任應天府丞二十八年陞總理河道右僉都御
史二十九年以右副都御史任本年遷南京兵部右侍郎未任
三十年改刑部三十一年歷刑部尚書詳刑部

應檀字子材浙江處州府遂昌縣人嘉靖丙戌進士二十二年
任湖廣提學副使二十八年任巡撫山東右僉都御史本年改
撫山西三十年以兵部侍郎兼僉都任本年改總督兩廣軍務

詳兩廣

駱顥字君孚四川敘州府富順縣人嘉靖癸未進士

六年任光祿寺卿二十七年陞巡撫山

東右僉都御史二十八年陞大理寺卿二十九年陞戶部右侍郎本年轉左三十年調南京戶部侍郎本年命改戶部侍郎兼僉都御史總督漕運兼理巡撫三十一年回籍

連鑛字伯金直隸廣平府永年縣人嘉靖丙戌進士

三十一年由總理河道右副都御史陞任

三十二年閑住

吳鵬字萬里浙江嘉興府秀水縣人嘉靖癸未進士十二年任

廣東提學僉事十七年改貴州丁憂二十二年陞雲南提學副使

三十二年以兵部侍郎兼僉都御史任詳吏部尚書

鄭曉字室甫浙江嘉興府海鹽縣人嘉靖癸未進士任兵部武選司主事十七年改吏部考功十八年改文選本年陞稽勲司員外郎十九年改驗封二十年改考功又改文選陞驗封郎中改考功二十二年改文選忤輔臣謫和州同知陞南太僕寺寺丞陞南京吏部考功司郎中二十六年陞南京尚寶司卿二十八年陞南京太僕寺少卿二十九年陞南京鴻臚寺卿三十一年陞南京光祿寺卿三十三年陞南京太常寺卿尋推刑部右

侍郎未任改兵部右侍郎兼右僉都御史總督漕運三十四年
陞吏部左侍郎三十五年推南京吏部尚書未任改都察院右
都御史兼兵部左侍郎協理戎務

國朝列卿紀卷之一百一終